

潮連鄉志

盧興原
署檢



673.3121

2117

:1

歷史地理研究室



印承局務印英瑞林

埠水滌龍九港香

號八零一至六零一街局醫

二八八六五話電

上海書店
冊數 1
售價 2.00

中華民國三十五年八月

潮連鄉志

魁金區錫鵬題

明太祖六諭

孝順父母 尊敬長上
和睦鄉里 教訓子孫
各安生理 莫作非為

陳玉堂敬錄

明太祖以六諭頒行天下言簡意賅婦孺皆曉清朝率而行之吾鄉曩時於每歲十月之夜瞽者聯羣以木鐸徇於路齊聲合唱藉以儆衆玉堂先生錄此吾鄉人苟能實踐之則化行而俗美矣

陳欣甫記

朱九江先生學規

敦行孝弟

崇尚名節

變化氣質

檢攝威儀

潘鵠騰敬錄

敬教勸學

湘甫仁弟有為



湘父家夫子近影

丙戌秋時年七十九

買絲繡平原黃
金寫范蠡古人
造像良有深意
湘父家夫子以
耆年碩德編輯
潮連鄉志文獻
之傳殊堪矜式
敬將近影弁諸
簡端以志景仰
門人 盧友生謹誌

王陽明先生客座私祝

但願溫恭直諒之友。來此講學論道。示以孝友謙和之行。德業相勸。過失相規。以教訓我子弟。毋使陷於非僻。不願狂躁惰慢之徒。來此博奕飲酒。長傲飾非。導以驕奢淫蕩之事。誘以貪財黷貨之謀。冥頑無恥。扇惑鼓動。以益我子弟之不肖。嗚呼。由前之說。是謂良士。由後之說。是謂凶人。苟遠良士而近凶人。是謂逆子。戒之戒之。

湘父校長嘗倩朱汝珍太史書此文懸之校中以教弟子
謹錄之以誌師訓并以告吾鄉之為子弟者

潮連鄉志總目

編輯者 鄉人 盧子駿 湘父

卷首 編輯者近影

潮連鄉全圖 凡例 自序

卷之一 輿地畧

卷之二 建置畧

卷之三 職官畧

卷之四 選舉畧

卷之五 人物畧

卷之六 藝文畧

卷之七 雜錄

潮連鄉志凡例

- 一、潮連向無鄉志。於吾鄉之歷史。紀載闕如。但有開必先。此作姑爲草創。
- 一、此志畧倣馮棧宗九江鄉志之例。依其門類編載。惟稍有增減。其門類爲我鄉所無者。缺之。爲我鄉所特有者則加入。
- 一、此志編輯之資料。先據新會縣林志彭志之關於潮連者錄出。或加以修飾。其次則采取譚鑑所著之新會鄉土志。其次則采訪陳盧區潘馬宋朱各姓之族譜。暨鄉人家譜之詳贍者。餘則考之各處之碑記。徵諸故老之傳聞。網羅放失。集成成編。
- 一、書中各畧。均據實紀載。其遺聞軼事。或關於吾鄉掌故者。亦附於雜錄。
- 一、書志鄉事。主勸善不主懲惡。凡吾鄉善人。前賢美舉。俱樂得表彰。以資鼓勵。若其事屬惡德。及足以留惡感。啓爭端。有玷鄉譽者。概不紀錄。
- 一、本鄉氏族。有分支別處者。或雖已他徙。而其祠堂祖墳。尚在潮連者。則仍以同鄉論。光遠而自他有耀。亦取其顯者著於篇。
- 一、民國以來。縣邑改區。都圖甲戶。不復知名。然久已相沿。不能遽廢。茲所紀載。名號多仍其舊。
- 一、志內文字。有所根據者。則注明錄邑志。或錄某氏譜。或云某某人述。以明來歷。
- 一、乙酉正月初十日。編輯者曾通函本鄉各姓團體。請將其本族之世系。人物。坊里。祠壇。廟宇。科第。仕宦。耆壽。列女。與夫名勝古蹟。遺聞軼事。詳細調查報告。以備擇錄。其後或有賜教。或未裁答。故紀載每有詳畧。閱者諒之。
- 一、預約認份諸君。例將其芳名份數。附載志末。以誌盛德。惟在鄉志印刷以後認份者。

則不及刊登。希爲原宥。

一、此次鄉志之成。得力於親友者甚夥。如區冕羣之詳示區譜。商訂文字。陳玉堂之述家風。陳世德。展轉宣傳。廣勸預約。區朗若之撰寄小傳。表揚奇節。潘鵠騰之潘氏掌故。鉅細靡遺。陳俊卿陳鈞協之陳氏見聞。原原本本。而博聞強記如陳古若。顧問所資。躬親采訪如區子端。實事求是。與夫區袞公區建公之殷勤商榷。歷述舊聞。陳壽南初爲潮連草圖。袞公更爲詳繪。建公妙寫圖說。陳醒樵捐資製版。以此合成佳構。又如馬叙朝梁公俊之回念故鄉。臚陳世系。凡斯文獻之傳。皆足增光志乘。至於代理收股。不憚賢勞。在鄉則有盧康雲。在港則有盧兼騰盧勉余。廣州則有潘達庭盧仲華。上海則有陳顯初。澳門則有陳兆熹。又如潘日如陳仿林陳欣甫盧輯五陳鴻璧陳葆珠巷頭陳伯衡等之協力宣傳。討論印務。衆擎共舉。獲益良多。其餘同鄉諸君。時惠教言。藉以輔助進行。補充資料者。尚不可勝數。若夫商量體例。指導方針。則家衮衮兄之賜教。實與我鄉諸君。同爲編者之良師益友。所爲永矢弗諼者。編者因人成事。自愧不文。而門人盧友生爲之造像。附於卷端。謂志景仰。此則尤爲滋愧耳。

善不積。不足以成名。惡不積。不足以滅身。小人以小善爲無益。而弗爲也。以小惡爲無傷。而弗去也。故惡積而不可掩。罪大而不可解。繫辭 潘日如錄

潮連鄉志自序

潮連一鄉。東西相距六里餘。南北相距五里餘。黑子彈丸。何足比數。雖然。在南宋咸淳以前。潮連僅一荒島。漁民蛋戶之所聚。蠻烟瘴雨之所歸。迨咸淳以後。南雄民族。展轉徙居。爾時雖爲流民。不過如鄭俠圖中一分子。然珠璣巷民族。大都宋南渡時。諸臣從駕入嶺。至止南雄。實皆中原衣冠之華胄也。是故披荆斬棘。易俗移風。而潮連始有文化焉。夫民族之富力。與文化最有關係。地球言文化。必以河流。粵省言文化。當以海坦。古世言文化。必以中原禮俗。現世言文化。必以瀕海交通。我潮連四面環海。屬西江流域。河流海坦。均擅其勝。以故交通便利。民智日開。宜乎文化富力。與日俱增。試觀各姓未來之前。其土著亦當不少。乃迄今六百年間。而土著不知何往。所留存之各姓。其發榮而滋長者。大都珠璣巷之苗裔也。省府州縣。均有志書。惟是範圍既廣。其於一鄉之掌故。語焉弗詳。竊思吳榮光有佛山鄉志。黎春曦馮棡宗先後纂九江鄉志。吾鄰鄉外海陳炬墀亦有龍溪鄉志畧之作。夫以潮連戶口之殷繁。人文之蔚起。其間山川風土。古蹟名勝。與夫科第仕宦。後先輝映。而遺聞軼事。可以昭法戒。資談柄者。亦復不少。豈能令其湮沒無傳耶。予嘗於宣統元年纂修盧鞭盧氏族譜。於一姓之事實。紀載頗詳。惟於同鄉各族之歷史。未能一一纂輯。心殊歉然。癸未冬。以寒假之暇。懷鉛握槊。博訪周諮。而吾鄉父老昆弟。又能不吝教誨。故所得益多。數年之間。哀然成帙。嗟乎。予今年七十又九。居鄉之時少。而作客之時多。其於潮連故實。所識幾何。率爾操觚。豈不謬妄。惟以環顧吾鄉。老成凋謝。落落幾如晨星。及今不圖。恐後此考獻徵文。更復寥寥無幾。存什一於千百。是則著者之微意爾。侏儒問天高於脩人。脩人曰。不知。侏儒曰。君雖不知。猶近於我。以今日而較來者。不猶脩

人侏儒之例耶。若夫言之無文。行而不遠。此則學識所限。深自悚慚。吾鄉不乏通才。後之覽者。或將因是而擴充之。潤色之。俾此區區小冊。蔚爲大觀。將見潮連之歷史。益以璀璨焜耀。照映來茲。是則吾鄉之榮施。而尤編者之厚望也夫。

中華民國三十五年丙戌夏五

鄉人盧子駿湘父序於香港加冕臺三號

出入相友 守望相助
疾病相扶持 則百姓親睦

孟子語 區朗若敬錄

潮連鄉志卷之一

輿地畧

山脈

河流

潮汐

氣候

風俗

物產

氏族

穀類

布類

果類

蔬類

木類

花類

草類

羽類

毛類

鱗類

介類

蟲類

蘆鞭盧氏

北廂盧氏

龍堂坊盧氏

大岡陳氏

芝山陳氏

巷頭陳氏

陳屋巷陳氏

坦邊潘氏

中巷潘氏

富岡區氏

方岳里區氏

豸尾區氏

甘邊馬氏

北廂李氏

彭邊梁氏

社邊宋氏

畹蘭里陳氏

大昌里孫氏

中巷鍾氏

曹巷曹氏

海頭何氏

山霞朱氏

雷灣李氏

社頭李氏

坊里

蘆鞭社邊
牙尾

巷頭
中巷
海頭

五圖
畹蘭里
雷灣

大岡
甘邊
山霞

芝山
龍堂坊
社頭

方岳里
坦邊

崔子玉座右銘

母道人之短。
世譽不足慕。
母使名過實。
柔弱生之徒。
慎言節飲食。

母說己之長。
惟仁爲紀綱。
守愚聖所藏。
老氏戒剛強。
知足勝不祥。

施人慎勿念。
隱心而後動。
在涅貴不緇。
行行鄙夫志。
行之苟有常。

受恩慎勿忘。
謗議庸何傷。
曖曖內含光。
悠悠固難量。
久久自芬芳。

陳俊卿敬錄

山脈

參邑志及新會鄉土志

崑崙以帕米爾高原。蟠鬱東亞。炎黃文化。隨而布護流行。其鍾秀於廣東者。卽崑崙之南支也。新會縣與開平台山鶴山恩平凡五縣。均以皂幕山爲主峯。昔人謂崑崙山爲地頂。皂幕山者。其卽五縣之地頂乎。蓋皂幕山有東行南行之兩山脈。其東北則趨於江門。精華所聚。爲出入交通之所必經。故五縣之郵電路航四大政。攢集於斯。爲一都會焉。我潮連卓立海中。空所依傍。惟附近江門。意其山脈蜿蜒起伏。殆亦皂幕之旁支。如大血管之有微絲血管也。潮連雖無高山大嶺。十數峯巒。僅如培塿。然尋其脈絡。亦有可畧述者。鄉中聚族而居。大率依山結村。自東南半邊山西出網山。迤北爲松梓山。爲禮山。爲芝山。其下爲芝山村。太平大井恩榮遜邊泰來諸里在焉。前爲蟹山。迤東爲煙山。卽蘆鞭之主峯。十三坊環列其下。禮山西出爲土牛山。又西爲萊山。其下則大岡甘邊等村。土牛山前有龜山。迤東蟹山。迤西北爲龍嶺。則巷頭。企石。方岳里。中巷。社邊。平岡。環繞於其麓。又西北爲鎮山。爲獅山。其下則有坦邊。西岐等。北至海旁爲大富山。其下爲大礮。故大礮亦稱富岡。半邊山。出爲猿子岡。東爲斜眉山。爲豸山。前爲狗山。爲大山。豸尾社頭等村。卽近於是。迤東爲獅山。爲琴山。而海頭。雷灣。山霞。諸村。悉附屬之。要之潮連諸山。雖無奇峯特起。突兀崢嶸。然率皆溫文秀潤。無粗獷之氣象。無枯槁之形容。故其人類多彬彬禮讓。樂易和平。而民智日以開通。人才以時輩出。所謂崧生嶽降。人傑地靈。其或山川靈淑之氣。有以韞蓄而孕育之耶。

河流

參九江鄉志

潮連爲西江流域。西江經流數千里。東西兩粵共之。勞孝與西江考。謂西江固南交之大瀆也。發源於牂牁。匯流於崖門。嶺以南別爲一瀆。故亦名牂牁江。又云。南海之九江。爲西江孔道。以入熊海。其上游則一由王借岡逕分水以趨珠江。一由石門以抱會城。今王借岡之沙口漸淺。石門則沙淤水涸。已而九江則以一水而受全江。是西江於九江實有關係。由九江經順德。甘竹至銀瓶咀。又西南行三滘沙至天河下橫江。其自銀瓶咀下至白藤。左爲順德。右爲新會。直注豬頭山。水至白藤分而爲二。西南經濠滘北街入江門。復分流入外海。迤東趨荷塘潮連。達於外海。是西江之於吾鄉。亦極有關係也。

潮汐

參邑志

潮汐之消長。關於日月之吸力。故晦朔弦望。其漲落皆有定時。間或遲速稍殊。斯則地勢之不同。或風色之關係耳。我新會潮汐。大率如下。潮連亦無大差別。每月初一二三日。十六七八日。則已時潮起。亥時汐起。初四五日。十九二十日。則子時潮起。午時汐起。初六七八日。廿一二三日。則丑時潮起。未時汐起。初九初十日。廿四五日。則寅時潮起。申時汐起。十一二三日。廿六七八日。則卯時潮起。酉時汐起。十四五日。廿九三十。則辰時潮起。戌時汐起。每月分六節。每五日分二時。此其常也。若大風作。則潮汐之長減半。風乍息。則潮汐之長畧增。此其偶也。說者又謂月之初八九十日。二十三四五日。潮消至七八分。汐水則起。俗謂之雜沓水。不限於丑未寅申時。此皆卽新會以論潮汐。而他邑不必盡同者。凡此皆舊歷之月日時也。方今推行新歷。以取世界之大同。國體自當如是。然潮汐之消長。於航海最關重要。與夫二十四節氣。亦農事所必需。是皆有賴於舊歷。故或有稱舊歷爲農歷。更有稱爲廢曆者。觀此。則舊歷不止適用於農。似宜並行不悖。而亦未

可偏廢耳。

氣 候

參邑志九江志

潮連四面環海。氣候不齊。頃刻間乍冷乍熱。調攝失宜。易致感冒。尤以三月十月爲最。故諺有急脫急著勝服藥之語。實養生之要訣也。

南漢書云。揚越之地。少陰多陽。投荒錄云。嶺南方盛夏。倏暘倏雨。大雨傾注。頃忽赫日。已復大雨。故炎熱甚於北土。自三月至九月。皆夏令也。潮連之氣候亦然。

南人有言。雨下便寒晴便暖。不論春夏與秋冬。然春未分仍有寒。秋未分仍有熱。諺云。春不分不暖。秋不分不寒。

海風四面而至。名曰颶風。颶者。具備四方之風也。颶風將至。則多虹霓。名曰颶母。颶風恆在夏秋間。測颶之法數端。一曰鬼頭雲。九夏日未出時。東方連朝有鬼頭雲。則將作颶。此驗於雲氣者也。一曰鬼打節。謂節氣日逢鬼宿。一鬼一颶。此驗於日歷者也。一曰水氣腥。或水變靛青色。則颶風起。此驗於江海者也。一曰苦竹骨葉有節。一節一颶。此驗於草卉者也。一曰鵲巢低。喜鵲不巢樹杪。其年必多大風。此驗於禽鳥者也。一曰三月十五大風雨。其年多颶。此驗於神誕者也。然亦時有不應。其餘夏月暴雨。天昏如夜。東北風疾。走石揚沙。名曰青涼。天黑無雲。西北風駛。其聲如電。一日而止。名曰赤游。天容澹澹。日光乍見。無雨無風。旋起旋變。名曰狂龍。此皆風氣之殊異者也。

嶺海氣候百變。至暴莫如颶風。次則龍氣。又次則石尤。俗曰石湖。皆海氣鬱積。因時而起。而有久暫之別。颶風縱不對時。亦逾半日。龍氣不越二三時辰。而皆能害物。崇禎庚